

COLOSSOS KA WATWAT PEAPTUP PAULO EMUDUPMUBARARAKTUP

¹⁻² Colossos ka watwat, cartadup mubarararağ òn eywebeaptum. Òn Paulo. Ijudup mubarararağ òn wuykitpit Timóteo eju. Eyju wuykitpitpiyũ Colossos ka be. Cristo a'õ dağ eyju jekukum soat em. Jesus Cristo emumuju òn Deus bikuyap tağ.

— Bay, xipan cuy Colossos ka watwat ejukuk — i òn e'em Deus pe—wuyebay be, Jesus Cristo be dak—wuykukukat pe. — Ixeyũ ağuy mubabibin cuy eguy — i òn e'em cebe ip.

³⁻⁴ — Itabut cĩcã ip Jesus Cristo kay Colossos ka watwat — i juk o'e Epafro ocewebe. — Xipan Deus ebekitkiyũ kuğ ip — i juk o'e. — Xipan soat kuğ ip, Deus xe acesop iap wiwim puye — i juk o'e ocewebe. Imēnpuye:

— Bay, ēn xipat cĩcã — i oceju e'em soat em Deus eju eywebeam kawēnwēn pima—Jesus Cristo ebay eju.

⁵ Soat em Deus xe acesop iap ekawēn kuy epejo-jojo kawēn icēmat co buje—kawēn idipat co buje. Iboap wiwim eyju ġasũ. Icēmān epesop ixē xe, “Oxe ma epesop” io'e Deus puye—kabi beat o'e buye. Imēnpuye Jesus kay eyetabut cĩcã. Xipan soat kuğ tak eyju. ⁶ Deus xipan wuykuğ—soat kuğ iap ekawēn kuy epeya'ĩjojo. Eyetaybit epesop iboap ekawēn icēmān iam koap em cekawēn co'isum. Soat eipi dağacat kawēn idipat cocom ġasũ. Ixeyũ dak itabut Jesus kay. Xipan soat

kuḡ tak ip itabucayũ kuḡ. Wuye'ũ buje soat em Deus xe acesop iap wiwim tak ip. ⁷ Epafras kawēn idipat o'ḡuwēn eywebe. Ixe Epafras wuybure ikukpin cīcāat wuyxe. Cũḡ me ixē kapikipiḡ Cristo muwēnuwēn warara'acat pe. Ixe eybuywatwan ocedieḡ ḡasũ bit.

⁸ — Colossos ka watwat jewewekuḡ ip cewekukpin cīcā, Deus jebiōḡbuk o'ḡuōm cebe ip puye — i juk o'e ixē Epafras ocewebe.

⁹ Imēneju soat em oceju kawēn Deus eju eywebeam. Eyawēḡ tobuxik puje ocebu'u ḡu ocesop jekawēn ām eywebeam. Imēn oceju e'em Deus pe:

— Bay, ocekitpitpiyũ juy eḡutaybin apēn ebikuy ixeyũ be jeku am iam — i. — Ixeyũ juy eḡutaybin apēn xipat exe iam, apēn ikērē exe iam tak — i oceju e'em. — Iboam itaybit cīcā je'e ip ebiōḡbuk ixeyũ mutaybitbin puye — i oceju e'em cebe.

¹⁰ Iboam eyetaybit pima, cũḡ ma epeku; soat em wuykukukat bikuyap taḡ epeku; soat em ixē mucokcokcoḡ epesop; xipacat epeḡujurũḡrũḡ soat em; biḡ ma eyetaybit epesop Deus e'e iam.

¹¹ — Bay, ēn soat podi ma a'ōbaca — i ōn e'em Deus pe. — Soat podi ma ēn edipap kuḡ — i ōn e'em. — A'ōbacaap cuy eḡũm Colossos ka watwat pe Jesus kay ip jebu'uap puxim ipiatpi'ajojom ma'ḡu ip — i ōn e'em Deus pe.

¹² Deus kabiaat kukat. Ixe ebekitkit xipacat mujurũḡrũḡ'ukayũ. Ixe xipacat muxipanpan iũm ām jebekitkit pe.

— Cũḡ ma eyju oxe webekitkiyũm — i juk o'e Deus wuywebe.

Imēnpuye wuyju dak xipacat acejat. Iboap wiwim cīcā wuyju. Imēnpuye eyju dak eycokcoğ cuy epe-sop.

— Xipat cīcā ěn — i juy epe'e'e wuyebay be.

¹³ Satanás kabiokat kukat. Ixe ebekitkit ikērēat mujurũğrũğ'ukayũ. Deus pit wuy'uk kabiokat kukat pui bewi. Imēnpuye Satanás ğu wuykukukat ğasũ—Deus ipot acā. Deus ipot ikukpin cīcā cexe.

¹⁴ Ixe ipot wuy'uk kabiokat kukat pui bewi. Ikērēat muğēaptei o'teida, oe'ũ buye. Imēnpuye ikērēat kuğ ğu wuyju ixe xe.

¹⁵ Deus ijo ba'ore wuywebe. Wuyetaybit bitku poro omuyku Cristo jojom, Cristo dak ijo'i buye. Ixe Cristo Deus ipot koapat. Soat Deus emumuğē bodi ma ya'õbuyxi ixe. Deus pe ipi mujurũğ'ũm pima ipot itait osunuy. ¹⁶ Deus soat o'ğubapukpukpuk Cristo eju. Kabi beacat o'ğubapukpukpuk soat ceweju, ipi dağacat tak. Wuywebe ijobucat o'ğubapuk soat, wuywebe ijo ba'oreat tak. Ya'õbuyxiayũ kabi watwat o'ğubapuk Cristo eju, ya'õbacaayũ dak, warara'acayũ mujuju'ukayũ dak, warara'acat kukukayũ dak. Deus ixe eju soat o'ğubapuk. Soat o'ğubapuk cebeam. Soat o'ğubapuk ijodiacat pe Cristo kuk am ibuyxi am. ¹⁷ Kabi, ipi ka'ũm pima, Cristo kuy osunuy itabēğ. Ipi dağacat jedopap pe ma dopdom Cristo a'õbi. Kabi beacat tak dopdom jedopap pe ixe a'õbi. ¹⁸ Wuya'a wuyjebit kukat iap puxim Cristo jekay itabucayũ kukat. Apēn wuya'a wuyağuydadam iap puxim Cristo dak itabut jekayayũ ağuydadam. Ixe Deus ipot koapat. Ce'ũap tomukadi Deus ixe Cristo waram o'ğutait. Soat podi ma ya'õbuyxian o'ğutait. Wuyju dak

waram acejetait wuye'ũ buje Deus ixē o'ğutait puye. ¹⁹ Deus o'e jewebe ma:

— Okpot ojo'ian je'e — i.

Imēnpuye jewa'ōbaca jojo'i ma ip. ²⁰ Ipi watwat itakoma osodop Deus kay, kabi beacat tak. Deus o'e jewebe ma:

— Soat ip o'ğudin obureyũm—ipi dağacat, kabi beacat tak — i. — Kũyjobin jeedop ip wa'ō kay korosa be okpot e'ũ buje — io'e jewebe ma.

Imēn Deus ip o'ğudin jewekay. Itakomaap ip o'ğũ'ũm korosa be jekpot oe'ũ ibuye.

²¹ Eyju dak Deus bureyũm ğu epesop kuy bima. Cekay'ũm cĩcã juk adi epesop. Imēnpuye ikērēat kay acã juk adi ğebum epesop. Ikērēat murũğrũğ'uk tak adi epesop. ²² Gasũ bit Deus eymuwexat jebureyũm ipot oe'ũ buye. Kuy eymuwexat ey mudot am jewekay. Imēnpuye cũğ ma epesop ixē wap eyajēm puje. Ikērēat kuğ ğu epesop. Abu je'e eywebe:

— Xipat ğu eyju! — i?

Ka'ũma ma! ²³ Imēneju eyetabun cĩcã juy epesop Jesus kay. Eybu'um ğu juy epesop cekay! Koap em kawēn idipat cō ebikam Deus xe acesop wuye'ũ buje iap wiwim cuk epesop. Eyday'em'um cuy epesop warara'acat pe ey mubu'unap puxim iboap wiwi am. Ibo muwēnuwēn'ukat ãn—kawēn idipat muwēnuwēn'ukat. Kawēn idipat muwēnuwēn ãn soat kaka dağ.

²⁴ Ocokcok cĩcã, ãn ipiat osupi'ajo eywebeam puye. Cristo ipiatpi'ajojom mabuk jekay itabucayũ beam—jejebit puximayũ beam. Imēnpuxim ãn tak ipiatpi'ajojom Cristo be o'supi'ajojo iap mu'ũm ãm. ²⁵ Deus o'e owebe:

— Itabucayũ buywatwan cuy eġuy — i. — Imēn ma kapikpiġ cuy eġuy wa'ōbi — io'e owebe. Ijop ekapikap o'ġũm owebe eybuywat am.

— Wekawēn muwēnuwēn cuy eġuy soat ka watwat pe — io'e owebe.

²⁶ Kuyje Deus soat ka watwat pe ġu jekawēn o'ġuwēnuwēn. Gasũ bit o'ġuwēn jekay itabucayũ be. Ibo ekawēn muwēnuwēn'ukat ōn. ²⁷ Cristo omuy eywebe Judeuyũ ġu ma'ġu eyju. Imēnpuye Deus jedipap mubapuk puje, eyju dak idipap kuġ epesop. Iboap wiwim cīcā eyju. Kuy bima iboap iba'arēm osodop soat xe ijodiacat xe. Gasũ bit Deus soat jebekitkit mutaybit pin iboam. Iboap idip cīcā. Xipat cīcā dak. ²⁸ Imēneju Cristo muwēnuwēn oceju soat ka watwat pe.

— Teyũku soat em Jesus kay e'em — i oceju e ojuy Deus pe ixē dopabe ixeyũ dojot puje. — Soat em teyũku Cristo eju mũġ'i jekukum — i oceju e ojuy cebe.

Imēneju Cristo muwēnuwēn oceju soat pe ijodiacat pe. Soat awēwēm oceju. Soat jetaybitbicap eju oceju ip imutaybitbin. ²⁹ Imēneju kapikpiġ cīcā ōn. Cristo ja'ōbacaap ũmũm owebe cebe wekapik am. Ixe Cristo soat podi ma ya'ōbaca. Ixe Cristo ja'ōbacaap ũmũm owebe. Imēnpuye ijodiacat mutaybin put owebe.

2

¹ Kapikpiġ cīcā juk adi oġuy eywebeam—ojojo'uk'ũmayũ beam, Laodicéia ka watwat peam tak. Ōn jeymukũyjo iboam. ² Cebeam ip cuk adi kapikpiġ cīcā oġuy ixeyũ be biġ ma jewewa'ōmucan am Jesus ekawēn

tağ jeku am; biğ ma jewewekukpin am tak; warara'acat podi ma itaybit am tak kawēn icēmān. Iboam itaybit pima, soat em Cristo kay jeedop ip. Jawağuyumuwarururun ġu jeedop ip Jesus ekawēn tağ xe'e oceku iam. Kuy bima itaybit ġu ip osodop Cristom. Gasū bit ip oitaybit ixem. ³ Soat ġu wuyetaybit Deus emumutaybitbin iam. Wuyetaybit ġūğūn ā. Cristo bit xīntabi o'tomudip'uk iap puxim. Cristo eju mūğ'i wuyju jekukum pima, wuyetaybit put Deus emumutaybitbin iam, apēn cūğ ma Deus xe iam tak, apēn cūğ ġu cexe iam tak.

⁴ Imēneju jeymukūyo ōn. Eyday'em'um cuy epesop warara'acat pe eymuğuykukuap puxim. Adeayū xe cekawēntip ip. Imēnpit cūğ ġu ip. Napa ma ip kawēnwēn eyweju eymutabucap ojuy napaap kay. ⁵ Imēneju soat em ġebum ōn eykay, eyxe ġu ma'ğu ōn. Pūğ tağ ma eyju e'em. Soat em eyetabut Jesus kay. Ocokcok cīcā ma iboap cocom puye.

⁶ — Ocekukukan cuy ece — i juk adi epe'e Jesus Cristo be, eyetabut puye cekay. Gasū bit mūğ'i juy epeku ixē eju. ⁷ Kadai nābu muycemap puxim Cristo wuya'ōmucanucan wuyetabucap epereap puxim. Imēnpuye biğ ma juy eyetabun epesop cekay. Ġebum cekayap to-muju juy soan e'em epesop. Kuy juk adi ocewebe eymutaybitbinap tağ cuy epeku. Soat em cuy epe'e'e Deus pe:

— Bay, ēn xipat cīcā — i. — Soat em ēn xipan ocekuğ — i juy epe'e'e cebe.

⁸ Eyday'em'um cuy epesop warara'acat pe eymubu'unap puxim Jesus kay apēn wuyju

taomũn ãm ibubum iap puxim. Ixeyũ Cristo ekawẽn ġu eymutaybitbin. Ijodiacat ekawẽn acã eymutaybitbin ip—Deus kay'ũmayũ ekawẽn—ipi juacat aġuymubarẽmrẽm'ukayũ ekawẽn. Eymuġuykuku ojuy ip. Te'e ma eymutaybitbin ip. Eyetabun ġu juy epesop ixeyũ a'õ kay. ⁹ Cristo jewa'õbaca jojo'i ma ip Deus eju. Cristo ijodiat co'ian o'jewexat wuymutaybit am Deus e'e am. Wuyetaybit Deus e'e am Cristo e'eap co buje. Imẽneju eyday'em'um cuy epesop warara'acat pe eymubu'unap puxim eyetabut am Jesus kay. ¹⁰ Cristo eju mũġ'i jekukum pima, wuyju dak Deus a'õbacaap kuġ acesop. Ixe Cristo soat podi ma ya'õbuyxiat—Deus ekawẽn tojotjot'ukayũ kukukayũ bodi ma, ibiõġbuk itabidaoiayũ kukukayũ bodi ma dak.

¹¹ Imẽntak Cristo ja'õbacaap o'ġũm eywebe ikẽrẽat kukap puxim ixe eju eyju mũġ'i buye. Aġokatkat'it'it taypu'aġobixeedakatkat'uk osodop ip kuyjeayũ teku iisu Deus xe i'eap ojuy. Deus pit soat taġ wuymuisusun wuyxeedakatkat puye ġu—Cristo eju wuyju mũġ'i buye acã. ¹² Wuymubatisasan puje Cristo a'õbi wuyaġuyokokat oi'ũm wuye'ũap puxim. Ixe a'õbi oi'ũm wuykocap puxim. Kuy bima Deus waram ġuto Jesus o'ġutait ce'ũap tomukadi. Imẽnpuxim ijodi bima dak wuyaġuy'isum wuyju jekukum waram ġuto wuyetaicap puxim wuye'ũap tomukadi. Wuyaġuy'isum wuyju jekukum ġasũ Deus soat podi ma ya'õbaca iap kay wuyetabut puye. ¹³ Imẽnpuxim eyju ma ikẽrẽat mujurũġrũġ cĩcã juk adi epekukuku eyaġuyokok puye. Ce'uat puxim cuk adi epesop

Deus xe ikērēat kay acã ġebum puye. Judeu'ũmat puxim tak cuk adi epesop—Deus pe wuyawēwēap ekawēn taġ jekukum'ũmat puxim. Deus pit kuy eyaġuymuisun eywebe Cristo aġuy daġ jewaġuy am. Wuyaġuymuisun puje, ixē ikērēat o'ju'uk wuywebewi. Soat o'ju'uk. ¹⁴ Iba'ore wuywebe Deus pe wuyawēwēap ekawēn taġ jeku am—soat ekawēn taġ. Deus itaybit soat em teyũku wekawēn mupubutbun iam. Korosa be ixē e'ũ buje bit, Cristo apēn cuk adi iboap ekawēn aġupubutbuniaptei o'teida. O'teida wuyekariwa be wuyeweroap teidaap puxim. Imēnpuye Deus ikērēat o'ju'uk wuywebewi. ¹⁵ Imēnpit Cristo Satanás a'ōbacaap o'ġu'ũm korosa be je'ũ buje. Deus kay'ũmayũ kukukayũ a'ōbacaap o'ġu'ũm. Soat etabun ya'ōbacaap o'ġu'ũmiayũ mubapukpuġ oeku imusũsũn ãm. Imubapukpuġ oeku kuyjeayũ be o'yaokaiat aririt'a mubapukap puxim.

¹⁶ Imēneju warara'acat a'ō kay ġu juy epesop eywebe te'e ma ixeyũ e'em pima “Beku i'opi eywebe” i, “Ibiati tikōnpi eywebe” i dak, “Ibeat kabia be epeyekapikpik ġu juy” i dak, “Kaxiaat ijēm'isu bima, peta juy epeġuġē” i dak, “Sábado bima epeyekapikpik ġu juy” i dak. Ya'ō kay ġu juy epesop. ¹⁷ Ixeyũ ekawēn taġ cuk adi jekuku'uk ajop Cristo ajēm'ũm pima. Kabicuk jewurũġwurũġ iap puxim jekawēn muwarururun ip soat em. Ġasũ bit Cristo oajēm. Ixē ekawēn soat em ma ibit. Imēnpuye ixeyũ ekawēn taġ ġu wuyju jekukum ġasũ—Cristo ekawēn taġ acã. ¹⁸ Warēmtaġ eymu-taybitbin'ukayũ:

— Deus ipiat supi'ajoat eywebe, cũġ ġu eyju cexe buye — i napa ma e'em ip eywebe.

Ixeyũ ekawẽn kay bit eyetabun ġu juy epesop. Jewexe ya'õbuyxi ip.

— Warara'acat podi ma oceju xipat Deus xe, soat em Deus ocemuyxeyxey buye — i'e'em ip te'e ma. — Ka'ũma ma oceju bit — i'e'em ip warara'acayũ be, “Warara'acat podi ma xipat oceju” i'e'em pima jewebe ma. — Deus kukap co'i juy cekawẽn to-jotjot'ukayũ ajukuk — i'e'em ip ocewebe te'e ma. — Warara'acat podi ma oceju xipat Deus xe — i'e'em ip te'e ma.

Warẽmtağ ma ip jewağuydadam. Deus ağuy dağ ġu ip jewağuyğuy—jağuy dağ acã. ¹⁹ Cristo eju mũğ'i ġu ip warẽmtağ jewağuyğuy buye. Cristo wuya'a buxim. Cekay itabucayũ ijebit puxim. Deus bikuyap tağ wuyju aypapan. Wuyekururukpu ibuboğatpu wuykukatpu wuyewedap tağatpu wuyewedap mucũğucũğatpu. Ibobu buxim Deus wuya'õmucanucan Cristo eju mũğ'i wuyeku am. Jewexe ya'õbuyxiayũ bit mũğ'i ġu ceweju.

²⁰ Cristo a'õbi eyağuyokokat oi'ũm eye'ũap puxim. Deus ja'õbacaap o'ğũm eywebe ibiõğbuk kērēat kukukayũ a'õ kayap puxim—Deus kay'ũmayũ kukukayũ a'õ kayap puxim. Imēneju Deus kay'ũmat ekukuap cuy epeyepere. Warẽmtağ eymutaybitbin'ukayũ a'õ kay ġu juy epesop.

²¹ — Boku juy epejukuk ġu — i'e'em ip te'e ma. — Beku juy epejo'o ġu — i dak. — Imēnmēn ġu bit epeku — i dak e'em ip te'e ma.

²² Soat ixeyũ xe ikukpiat, i'opiat, tikõnpiati darem ma kuy kapkam. Ijodiacat ekawẽn acã imuwẽnuwẽn ip—Deus ekawẽn ġu bit. Ijodiacat

ağuy dağ acã ip kawẽnwẽn—Deus ağuy dağ ğu bit.
²³ Jewexe ip itaybitbit.

— Deus kukap co'a juy cekawẽn tojtjot'ukayũ ajukuk — i'e'e ip te'e ma. — Ka'ũma ma oceju bit — i'e'em ip warara'acat pe, “Warara'acat podi ma xipat oceju Deus xe” i'e'em pima jewebe ma. Ade cexe ip ikukpiat, i'opiat tak, tikõnpiati dak. Xipan ğu ip jejebit kuğ. Tũybe ikêrêat acejukuk'ũma iãn e'em ip. Ibo bit ka'ũma jo'i ma. Wuybuywat pa'ore ikêrêat kukap puxim.

3

¹ Waram o'jetaitiat puxim eyju Cristo eju mũğ'i jekukum puye. Imẽnpuye eyetabikum cuy epe-sop kabi beat kay. Iboce Cristo omuy Deus xe xik'i ya'õbuyxiat tũyap pe, Deus co'i ya'õbuyxi buye.
²⁻³ Ijodiacat eju ğu mũğ'i eyju jekukum—Cristo eju acã mũğ'i eyju jekukum. Imẽnpuye ijoceap kay ğu juy epeyewağuyğuy—kabi beat kay acã. Pũğ tağ ma jewağuyğuy ip Deus, Cristo dak. Ixeyũ ağuy dağ eyju dak jewağuyğuy ğasũ bit, Cristo eju mũğ'i eyju jekukum puye. Iboap ibapuk ğu itabut'ũmayũ xe. Iba'arêm iboap cexe ip. ⁴ Eyağuy'isum eyju jekukum Cristo eju mũğ'i buye. Waram yajêm puje, wuyju dak acejewemubapuk ceweju. Ixe dipap acejat. Wuydip ace'e ixex jo'i.

⁵ Imêneju ikêrêat epeğugẽ ğu juy. Ikêrêat muğẽğẽ pin eyju Deus kay'umat puxim. Epeğugẽ ğu bit. Warara'acat tayxi eju epeyepo ğu juy. Warara'acat itop eju epeyepo ğu juy. Ikêrêan cuy epeyekaypatpan ğu. Ikêrêat epeğujurũğ ğu juy eyemumukaypin pu am. Aoyũ kaykay ğu juy epesop. Eyetabikukum ğu juy epesop

warara'acat pubut kay. Wuyetabikukuap ikērēat Deus xe deusbaroyū kay wuyetabucap puxim. ⁶ Deus ipiat supi'ajojoat imēn jekuku'ukayū be—kūyjobit'ūmayū be—ja'ō kay'ūmayū be. ⁷ Eyju dak cuk adi kuy bima warēmtaḡ ma epekukuku. Eycokcok epesop ikērēat muḡēḡē'ukap kuḡ.

⁸ Gasū bit ijop epeyepere. Eyetakomām ḡu juy epesop warara'acat kay. Aoyū kaykay ḡu juy. Eysapka'orerem ḡu juy epesop. Warara'acat epejomuymuy ḡu juy. Eyekawēnkērēm ḡu juy epesop—pūḡ em tak ka'ūma. ⁹⁻¹⁰ Cristo kay eyetabut puje, yaḡuy'suayūm epesop. Kuy bima eyaḡuyokok cuk adi epekuku. Eyaḡuyokok ḡu juy epekuku ḡasū bit. Deus soat em wuyaḡuymuisusun wuywebe jejo'i i'e am. Guyjom Deus aḡuy daḡ acā ḡebum acesop. Biḡ ma wuyetaybit ace'e Deus e'e am. Napa ḡu juy epe'e'e eyewewebe. ¹¹ Wuyaḡuy'isu bima, ḡebum ḡu acesop teku Judeu iap kay, teku Judeu ḡu iap kay dak. Gebum ḡu acesop teku taypu'aḡobixeecekuk iap kay dak, teku taypu'aḡobixeecekuk'ūmat iap kay dak. Gebum ḡu acesop teku pariwat iap kay, teku wuyjuyū iap kay dak. Gebum ḡu acesop teku tei'ūma kapikpik'ukat iap kay, teku teibubum kapikpik'ukat iap kay dak. Cristo kay acā ḡebum acesop. Iteyū be soat pe Cristo muymuy iap kay ḡebum acesop.

¹² Deus ebekitkit eyju. Deus xe eykukpin cīcā epesop. Ixe juk eynaē jewekay am. Imēneju eyetabotaidabotbon cuy epesop eyewewekay. Xipan cuy epeyewewekuk. Yoboḡan pin ḡu juy epesop Eyekawēnkērēm ḡu juy epesop—eyekawēntim ma. Eyukpiceḡēm ḡu juy epesop eyewewekay.

¹³ Epeyewebuywatwan cuy soat em. Eyxeat warēmtaḡ eykuḡ pima, ixē epejomuymuy ḡu juy. Gebum ḡu juy epesop apēn cuk adi warēmtaḡ eykuk iap kay. Wuykukukat Jesus ḡebum ḡu apēn cuk adi ikērēat aḡujurūḡrūḡ iap kay. Ixē buxim cuy eyju dak ḡebum ḡu epesop apēn cuk adi warēmtaḡ eykuk iap kay. ¹⁴ Xipan eyekukuap xipat Deus xe. Ibodi ma bit xipat eywebe xipan eye-wewekuk am. Xipan jewewekuḡ pima, wara'at taḡtaḡtaḡ ḡu epekuku—pūḡ taḡ ma. ¹⁵ Cristo juk wuymuwexat jebekitkiyūm pūḡ taḡ ma wuyeku am. Ixē wuyaḡuymubabibin wuyaḡuybabi'ūmap puxim. Āḡ cuy ixē jeyaḡuymubabin. Ixē be eyaḡuymubabin puje xipan epeyewekuk. Pūḡ tak ma dak epeyewaḡuy. Soat em:

— Bay, ēn xipan cīcā ocekuḡ — i juy epe'e'e Deus pe.

¹⁶ Soat em Cristo ekawēn taḡ cuy epekuku. Xipat cekawēn taḡ wuyeku am wuyju idip cīcāat kuḡat puxim. Soan cuy jewemutaybitbin epesop. Soan cuy jewemukūyjobitbin tak epesop. Soat em cuy pibododon epesop Deus kay. “Cristo soat podi ma ya'ōbuyxi” i'e pin pima, epeyebibododon cuy, “Cristo acā wuykukukat” i'e pin pima dak, eycok-cok pima dak Cristo kay eyetabut puye, “Ēn xipat cīcā” i'e pin pima dak Deus pe. Deus biōḡbuk a'ōbi juy pibododon epesop. ¹⁷ Imēneju soat em cuy epekuku wuykukukat Jesus a'ō daḡ. Soat em cuy epeyekawēnwēn ixē a'ō daḡ. Soat em:

— Ēn xipat cīcā — i juy epe'e'e wuyebay be—Deus pe, wuykukukat Jesus oe'ū buye.

¹⁸ Tū'ū'ūyū, kūyjobin cuy epesop eyitopyū a'ō

kay. Kūyjobin cuy epesop ya'ō kay ip wuykukukat Jesus kay eyetabut puye.

¹⁹ Tapupuyū, ikukpin cuy eytayxiyū epejukuk. Xipan cuy ip epejukuk.

²⁰ Bekitkit, kūyjobin cuy epesop eyebay a'ō kay soat em, eyxi a'ō kay dak. Wuykukukat icokcok e'em eyebay a'ō kay bima.

²¹ Cebayū, imuparararan ġu juy eyebekitkiyū epejukuk ixeyū mubu'unap puxim kūyjobit am eya'ō kay.

²² Tei'ūma kapikpik'ukayū, soat em cuy kūyjobin epesop eyekariwa a'ō kay ixeyū eyjojom pima, eyjojom'ūm pima dak. Ixeyū a'ō kay kūyjobin cuy epesop ixeyū be “Ēn xipat” i'eap ojuy ġu. Kūyjobin cuy epesop kūyjobit pin puye. Kūyjobin cuy epesop wuykukukat Jesus ya'ōbuyxi eyxe buye.

²³ Eycokcoġ cuy eyekapikap epejukuk. Gebum cuy epesop ijodiacat peam acā ġu ōn kapikpiġ iap kay. Wuykukukat peam tak ōn kapikpiġ iap kay ġebum cuy epesop. ²⁴ Cristo ma wuykukukat. Ixe beam ma wuyju kapikpiġ. Wuykukukat jebekitkit peam xipacat o'ġuxipan. Ibo juy epejat. Gebum cuy epesop iboap kay. Cūġ ma wuyeku buje, cūġ ma jekuaptei je'ġūm wuywebe. ²⁵ Warēmtaġ wuyeku buje bit, warēmtaġ jekuaptei dak je'ġūm wuywebe. Ipiat supi'ajoat wuywebe. Ixe Deus cūġ ma wuykuġ. Cedaġ ma wuyekapikaptei je'ġūm wuywebe. Weġūġūn ma wuykuġ.

4

¹ Kariwawayū, cūġ ma juy eywebeam tei'ūma kapikpik'ukayū epejukuk. Imuġuykukukum ġu ip epejukuk. Eyju dak kapikpiġ eyekariwa

beam—kabi beat peam. Gebum cuy epesop iboap kay.

² Eybu'um ġu juy epesop Deus eju kawēn ām. Xexen ġu juy epesop kawēnwēn pima ceweju—eyetabēḡbēḡ ma.

— Ēn xipat cīcā — i juy epe'e'e cebe.

³ Ocewebeam tak cuy epeyekawēn Deus eju.

— Pauloyū buywatwan cuy eḡuy ixeyū be ekawēn muwēn ām soat ka watwat pe — i juy epe'e'e cebe. — Ixeyū buywatwan cuy eḡuy Cristo muwēn ām soat pe—kuy bima o'ḡuwēn ġu iat ekawēn muwēn ām — i juy epe'e'e cebe.

Daomūnmūnap'a be ōn ḡasū iboap ekawēn muwēnuwēn cuk adi ojekuku buye. ⁴ Ibapuḡ ma juy iboap ekawēn oḡuwēn. Imēnpuye:

— Pauloyū juy esubuywatwan ixeyū be ibapuḡ ma kawēn idipat muwēn ām adeayū be — i juy epe'e'e cebe.

⁵ Eysūsūn ġu juy epesop Jesus muwēn ām itabut'ūmayū be imuwēn put pima. Eyaḡuysan cuy epeku ixeyū mu'ukpiceḡḡēnap puxim Cristo kay.

⁶ Te'e ġu juy epeyekawēn itabut'ūmayū eju. Eye-kawēnkum cuy epeyekawēn ceweju ip eyekawēn kay ip ibu'unap puxim. Eyetaybin cuy epesop cedaḡ ma ya'ōbu am ip.

⁷ Wuykitpit Tícico wawēḡ ḡuwēn eywebe—soat awēḡ ḡuwēn. Ixe Tícico ikukpin cīcā wuyxe. Ixe cūḡ ma kapikpiḡ warara'acayū beam—itabucayū beam. Wuyweju ixē dak kapikpiḡ wuykukukat peam. ⁸ Ixe oḡuju eykay eymucokcok am, oceju xipat iap muwēn ām eywebe. ⁹ Wuykitpit Onésimo oḡuju eykay Tícico eju. Ixe Onésimo cūḡ ma

jekukum. Ikukpin cīcā wuyxe. Eyka bewiat ixē. Apēnpēn ijopka watwat iap gūwēn ip eywebe.

¹⁰ Aristarco kato mujujum eywebe. Oweju ixē dak omuy daomūnmūnmūnap'a be. Marcos tak kato mujujum eywebe—Barnabé kipitaap. Ixē Marcos eykay jajēm iap awēḡ kuy epeyawēḡtobuxik. Ixē ajēm puje xipan cuy epeḡuajēm eyduk'a be. ¹¹ Josué Justo kato mujujum eywebe. Ixeyū acā Judeuyū kapikpiḡ oweju—ebapūḡayū: Aristarco, Marcos, Josué Justo. Ibūrū ma. Kapikpiḡ ip oweju warara'acayū mutabut am Jesus kay, Deus pe jekuk am. Obuywatwan cīcā osodop ip omucokcokcoḡ.

¹² Epafras tak kato mujujum eywebe—eyka bewiat—Jesus Cristo beam kapikpik'ukat. Soat em ixē kawēnwēn Deus eju eywebeam.

— Colossos ka watwat a'ōmucanucan cuy eḡuy ixeyū be jetabucap epereap puxim — i'e'em ixē Deus pe eymuwēnuwēn. — Ixeyū a'ōmucanucan cuy eḡuy ixeyū be Jesus eju mūḡ'i jeku am — i'e'em ixē cebe. — Ixeyū a'ōmucanucan cuy eḡuy ixeyū be soat em ma ebikuyap taḡ jeku am — i'e'em ixē Deus pe eymuwēnuwēn.

¹³ Kapikap iba'ore jījāat kukap puxim ixē Epafro kawēnwēn cīcā Deus eju eywebeam, Laodicéia ka watwat peam tak, Hieríapolis ka watwat peam tak. Ōn ma iboap muwēnuwēn eymukūyjojom.

¹⁴ Lucas kato mujujum eywebe—ocexe ikukpin cīcāat—wuyanūḡtata'ukat. Demas tak kato mujujum eywebe.

¹⁵ Ocejū kato mujujum warara'acayū be Jesus kay itabucayū be—Laodicéia ka watwat

pe. Ninfa be dak kato mujujum oceju, ixeduk'a be je'aweroro'ukayũ be dak—itabucayũ be. ¹⁶ Eywebe ijidup co buje juy epetupmuju Laodicéia ka watwat pe ixeyũ be tup co am. Kuy juk wara'atup otupmuju ixeyũ beaptum. Ixedup ixeyũ tupmuju eywebe tupco buje. Ixedup tak epetupcoat.

¹⁷ — Wuykukukat ewebe o'gũmiap ekapikap kuḡ cuy ejeku — i juy epe'e Arquipo be. — Ekapikap cuy eḡu'ũm — i juy epe'e cebe.

¹⁸ Ōn ma obubin ma Paulo kato mujujum eywebe iaptup mubarararaḡ. Eyaḡuyba'ũm ḡu juy epesop kawēn ãm Deus eju owebeam, ōn daomũnmũnap'a be bima.

— Bay, xipan cuy Colossos ka watwat ejukuk — i ōn e'em Deus pe.
Wemudupmubararaktup pe bit kuy oi'ũm.

**Deus ekawẽntup Kawẽn iisuat ekawẽn
New Testament in Mundurukú (BR:myu:Mundurukú)**

copyright © 2010 Wycliffe Bible Translators, Inc.

Language: Mundurukú

Translation by: Wycliffe Bible Translators, Inc.

Mundurukú [myu], Brazil

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mundurukú

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022

82289dff-6b79-5335-974c-563b93a888ae